

## Script of Morning Gojri News Bulletin 08 March 2026 at 1015 Hrs

مارننگ گو جری نیوز بلیٹن مورخہ 08 مارچ 2026

\*\*\*\*\*

یوہ آکاشوانی جموں ہے محمد امین انجم تیں خبر سُنو۔

### LG International Women Day

لیفٹنٹ گورنر منوج سنہا نے کہیو ہے جے کالسریاں غی باختیاری سماج غی ترقی تے غریبی غا خاتمہ واسطے بڑی ضروری ہے۔ خواتین بارے بین القوامی تیہاڑا غا موقع ور اپنا پیغام مانہ لیفٹنٹ گورنر نے کہیو ہے جے یوہ دن مُلک غی ترقی غا سفر مانہ قدم آگے بدھان غا سلسلہ مانہ کالسریاں نانہ تحریک دے گو۔ انہاں نے کہیو ہے جے کالسریاں سماج نانہ نویں شکل دین واسطے انتھک کم کر رہی ہیں۔ جناب سنہا نے مزید کہیو جے یوٹی تیں کئی باصلاحیت کالسریاں جموں کشمیر نانہ پُر امن تے خوشحال بنان غی خاطر اپنا اپنا شعباں مانہ بہترین کارکردگی غو مظاہرہ کر رہی ہیں۔

-----

### LG Appointment Letter

لیفٹنٹ گورنر منوج سنہا نے کل شریمتی سپتا بندرال زوجہ سلیکشن گریڈ کا نسیٹبل لوکیش سنگھ نانہ ہمدردی غی بنیا د ور تقرری خط سونپیو۔ ایس ایس ایف غا مذکورہ جوان غی ایکن سڑک حادثہ مانہ موت ہو گئی تھی۔ لیفٹنٹ گورنر نے متوفی ایس ایس ایف جوان غا کنبہ نانہ انتظامیہ غی طرفوں تمام ممکن امداد تے حمایت غی یقین دہانی کرائی۔

-----

### CM

وزیر اعلیٰ عمر عبداللہ نے باریں بجلی ترقیات محکمہ نانہ ہدایت کی جے وہ زمینی سطح ور کم کرن آلا عملہ واسطے سخت حفاظتی تدابیر اپنا وے۔ انہاں نے زور پایو جے سرکار " زیر کیزولٹی" غو مقصد حاصل کرن آلے پاسے لازمی طور ور رکم کرنو چاوے۔ لائن مین تیہاڑا غی تقریب غی صدارت کرتاں واں جناب عبداللہ نے کہیو جے جموں کشمیر حکومت بجلی محکمہ غے ہمراہ بجلی نال منسلک کم نال جڑیا ہر لائن مین غی حفاظت یقینی بناوے گی۔ اس سلسلہ مانہ تقریب غو انعقاد بجلی محکمہ نے کیو تھو۔

-----

### Army Synergy Conference

فوج غی شمالی کمانڈ صدر مقام اُدھم پور نے انڈو تیبیتین سرحدی پولیس آئی ٹی بی پی تے سرحدی حفاظتی دستہ بی ایس ایف نال ایک ہم آہنگی کا نفرنس غی میزبانی کی۔ اس کا نفرنس غو مقصد حفاظتی للکاراں بشکار تال میل نانہ باہدو دینو تھو۔ لیفٹنٹ جنرل پراتک شرما جہیڑا جے شمالی کمانڈ غا جنرل افسر کمانڈینگ ان چیف ہیں غی صدارت مانہ کا نفرنس حکمت عملیاں نانہ ہم آہنگ کرن ور مرکوز تھی۔ لیفٹنٹ جنرل شرما نے شرکا غی تندہی واسطے اُن غی تعریف کی۔

-----

## Rail One app

بھارتی ریلویز نے اپنی سرکاری سوپر ایپ "ریلوون" شروع کی ، تانجے اکو جگہ کنیں خدمات مہیا کرا غے مسافراں غو سفر ہو رآسان بنايو جا سکے۔ یاہ ایپ مسافراں نانہہ ٹکٹ بُک کرن، ریل گڈی غی صورتحال وغیرہ جیسی سہولیات مہیا کراوے۔ اس ایپ غی شروعات نال جموں کشمیر غا کلیدی اسٹیشناں غے ذریعے سفر کرن آلا مسافراں نانہہ کھانا غا آرڈر دین غی وی سہولت دستیاب ہے۔ جموں ریلوے ڈویژن نے مسافراں نانہہ کہیو ہے جے ویں "ریلوون" ایپ غو زیادہ تیں زیادہ استعمال کریں۔

-----

## Festival Arrangement

ضلع مانہہ آتا شبِ قدر مقدس نوراتراں، عید الفطر، نور روز تے رام نومی تہواراں غا سلسلہ مانہہ انتظامات ور تبادلہ خیال کرن غی خاطر ڈپٹی کمشنر ادھم پور نے افسراں تے سیانا شہریاں غی ایکن میٹنگ بُلائی۔ اس موقع ور تبادلہ خیال سلامتی ، پین غا پانی، بجلی سپلائی، صاف صفائی، ٹریفک تے مارکیٹ چیک ور مرکز تھو۔ میٹنگ مانہہ بلا رکا وٹ خدمات، پولیس حفاظت صاف صفائی، ٹریفک انتظام وغیرہ بارے ہدایات جاری کی گئیں۔ تہواری تیہاڑاں واسطے شہریاں تیں وی تعاون منگیو گیو ہے۔

-----

## T 20 World Cup

آئی سی سی ٹی ٹوانٹی کرکٹ عالمی کپ فائنل مانہہ اج بھارت غو مقابلو نیوزی لینڈ نال وے گو۔ یوہ میچ نریندر مو دی اسٹیڈیم احمد آباد مانہہ کھیڈیو جائے گو۔ میچ شام 7 بجے شروع وے گو۔ بھارتی ٹیم چوتھی بار ٹی ٹوانٹی عالمی کپ غا فائنل مقابلہ مانہہ باندے آوے گی۔ دوجے پاسے نیوزی لینڈ دوجی بار فائنل مقابلہ مانہہ کھیڈتاں واں پہلی ٹرافی غو پچھو کرے گی۔ بھارتی ٹیم نے انگلینڈ نانہہ ہراتاں واں فائنل مقابلہ مانہہ جگہ بنائی ہے ، جد کہ نیوزی لینڈ نے جنوبی افریقہ نانہہ کو لکتہ مانہہ 9 وکٹاں نال ہرايو تھو۔

-----

## Weather

محکمہ موسمیات نے اج تیں جموں کشمیر پھر مانہہ موسم مانہہ تبدیلی غی پیشنگوئی کی ہے۔ اس سلسلہ مانہہ اج تے پہلک بشکار موسم عام طور ور آبر آلود رہے گو۔ تے اس راہ کُجھ اک اُچیرا علاقان مانہہ ہلکی بارش یاہ برفباری غو امکان ہے۔ 10 مارچ تیں عام طور ور بدل چھایہ رہن غو امکان ہے ، جد کہ یوٹی پھر مانہہ اُچیری تھاریں ہلکی بارش یاہ برفباری ہوسکے۔

-----

اس غے نال ہی خبراں غو یوہ بلیٹن ختم ہوؤ۔